

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



**VASEGA MATUTUA FAAPITOA**

\*\*\*\*\*



**IANUARI - IUNI**

XX

**2026**

SAUNIA : OFISA O A'OA'OGA KERISIANO



EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



**VASEGA MATUTUA**

\*\*\*\*\*



**IANUARI - IUNI**

XX

**2026**

SAUNIA : OFISA O A'OA'OGA KERISIANO

**TUSI AOGA VASEGA MATUTUA FA'APITOA**  
**FA'ASOLOGA O MATAUPU O LE TUSI.**  
**MATAUPU**

**ASO/MASINA**

**TUSI FAITAU**

1.Fepuari 01, 2026	“Igoa – Valaauiina”	Isaia 43:1-7
2.Fepuari 08, 2026	“Ta’utinoga fa’amaoni a Ruta”	Ruta 1:1-18
3.Fepuari 15, 2026	“Toe omai fa’atasi”	Salamo 133
4.Fepuari 22, 2026	“SUEGA FA’AMANATU”	
5.Mati 01, 2026	“O le mana o le Talalelei”	Roma 1:1-17
6.Mati 08, 2026	“Malaia mai le Fa’atoaga”	Kenese 3:8-24
7.Mati 15, 2026	“O fea lou fa’asinomaga”	Teuterenome 6:1-12
8.Mati 22, 2026	“Aga’i i le pogisa”	Mataio 16:21-28
9.Mati 29, 2026	“Malosi ma le Auai”	Mataio 26:47-56
10.Aperila 05, 2026	“E moni le Toetu”	Mataio 28:1-20
11.Aperila 12, 2026	“O le laulaufaiva mimita”	Salamo 12:1-4
12.Aperila 19, 2026	“O uiga fa’amaualuga”	Ioane 7:40-52
13.Aperila 26, 2026	“SUEGA FA’AMANATU”	
14.Me 03, 2026	“Saili le mapusaga mo lou loto”	Mataio 11:20-30
15.Me 10, 2026	“Ua le mautonu Mose”	Esoto 4:1-17
16.Me 17, 2026	“Aperamo”	Kenese 12:10-20
17.Me 24, 2026	“O le Agaga Paia”	Tito 3:3-8
18.Me 31, 2026	“MATAUPU FA’AMANATU”	
19.Iuni 07, 2026	“Omai nei, tatou mafaufau”	Isaia 1:10-20
20.Iuni 14, 2026	“O latou, ae le o Tatou”	Isaia 10:1-4
21.Iuni 21, 2026	“Galueaina”	Iona 4:1-11
22.Iuni 28, 2026	“SUEGA FA’AI’U”	

## TUSI AOGA ASO SA VASEGA MATUTUA FA'APITOA

**ASO SA FEPUARI 01, 2026**

**MATAUPU: "IGOA - VALA'AUINA"** (Name – calling)

**TUSI FAITAU:** Isaia 43: 1-7

**SINI:** Ia malamalama le fanau, o le Atua na te fa'amamaluina o tatou igoa i lona suafa paia, atoa ai ma o tatou valaauina ese'ese.

**FESOASOANI MO FAIAOGA:**

I le suafa manumalo o lo tatou Alii o Iesu Keriso, e fa'afeiloa'i atu ai ma ofoalofa atu i a outou susuga i Fa'afeagaiga ma Faletua, fa'apea le mamalu o Faiaoga Aso Sa. Talitonu i le alofa ma le agalelei o le Atua o lo'o manuia i tatou uma. Manatu foi ua maua se malosi fa'asili mai le malologa sa feagai ai, ae a le amataina o a tatou galuega o lenei foi tausaga ua tatou aulia mai ma le manuia. O le tatou valaauina mo lenei galuega, e ao lava ona tatou galulue fa'atasi e tusa ai o le fa'atinoina o tatou tiute tauave. O le fa'amanatu lava, o le lava o lou taimi e su'esu'e ai ma faitau le tusi faitau, e nanea ma faigofie ai le fa'amatalaina o le mataupu.

**SINA FESOASOANI MO LE MATAUPU:**

O le tatou tusi faitau o lenei taeao, o lo'o palasi i le vaega e lua e tusa ai ma le vaevaeina o le tusi lenei o Isaia i se isi va'aiga i le tusi atoa. O lona uiga, pe a fua i ai e tusa ai ma lea va'aiga pe a faitauina le tusi o Isaia, o lo'o taoto le mataupu lenei i le vaega e lua, i le taimi ua fa'atafea ai le nu'u o le Atua i Papeleonia. O le feau atoa a le perofeta o Isaia, o le feau fa'amafanafana, o upu fa'alototele ma upu tima'i mo Isaraelu, le nu'u na vala'auina e le Atua latou te osifeagaiga. O le feau mo le Isaraelu ua galo le Atua, a'o le toe fa'amanatu ina ia o latou manatua le na vala'auina i latou.

Ua fetalai le Atua e ala atu ia Isaia, na ou faia oe Iakopo e, na ou faia oe Isaraelu e, aua le fefe, aua ua ou fa'atauina oe, ua ou valaauina oe i lou lava igoa, e faia oe mo'u. O lona uiga, o le feau fa'alototele mo Isaraelu, a o'o ina tutupu pefea ma puapuaga ia te outou, ia outou manatua le Atua na valaauina outou. O ia na te lavea'iina ma fa'aolaina outou mai faigata e feagai i la outou savaliga. O le uiga lea o upu, a e sopoia atu vaitafe, e le lofia ai oe, a e savali i totonu o le afi, e le mu ai oe; e le susunuina foi oe i le mumu o le afi. O le ata o le Atua lavea'i ma le Atua alofa, a'o le fa'aailoga o fa'afitauli e tutupu pea i le savaliga a le tagata. O lo'o fa'amatala e ia mea le mamalu ma le paia o le Atua, e ao lava ona tau'ave e le tagata. O mea uma foi e faia e le tagata i le suafa o le Alii, e faia ina ia viia ai le Atua.

O le igoa na valaauina ai e le Atua lona nu'u, o Iakopo lea na suia mai ai ia Isaraelu. O Aperamo, Isaako ma Iakopo, o auga Tama ia na osi feagaiga ma le Atua i le amataga, e fai oe Isaraelu mo'u nu'u, ae fai A'u (Atua) ma outou Atua. O le vala'auina lea o Isaraelu e le Atua, e le fa'avaitaimi pe fai nei ae uma taeao, e leai, e fa'avavau. Tusa lava pe femoumoua'i tagata o lona nu'u, ae tumau pea le Atua i lana feagaiga. A o uiga ia o le Atua lea tatou te fa'atuatua ma talitonu i ai. Po'o a lava o tatou fa'aletonu, po'o le a le tatou le usita'i, o a foi o tatou uiga leaga e faia i lea aso ma lea taimi, e tumau pea lona alofa mo i tatou.

Tamaiti, o le feau fa'amanatu foi lea mo tatou le fanau, e tofua lava tatou ma o tatou valaauina mai le Atua. O le ala foi lea e naunau ai matua e ave tatou i le aoga, ina ia saili le potu ma fa'alautele le iloa ma ia tau lau o lou fa'amoemoe i le lumana'i. O uiga o le Atua, e auala mai i o tatou matua, o lou le usita'i i matua, o lou le usita'i lava lea i le Atua. O le mafua'aga foi lea po'o le a lava le le usita'i ma le le fa'alogu o outou i matua, ae alolofa lava ia te outou le fanau. A ia outou iloa, o le tama ma le teine e ususita'i i ona matua, e fa'amanuiaina e le Atua lona olaga i le lumana'i. E tele foi lu'itau ma fa'afitauli e feagai ma tatou, ae le mafai ona tu'ulafoa'iina i tatou e le Atua.

**GALUEGA FA'ATINO: Fa'atumu avanoa i upu nei.**

*susunuina, Atiope, Faaola, sopoia, Sepa, lofia, togiola, vaitafe, Paia, savali, Aikupito, afi.*

A e \_\_\_\_\_ atu le vai, ou te ia te oe; a e sopoia atu \_\_\_\_\_, e le \_\_\_\_\_ ai oe; a e \_\_\_\_\_ i totonu o le afi, e le \_\_\_\_\_ mu ai oe; e le \_\_\_\_\_ foi oe i le mumu o le \_\_\_\_\_. Aua o a'u o le Alii lou Atua, o le \_\_\_\_\_ o Isaraelu, lou \_\_\_\_\_; na a'u avatua \_\_\_\_\_ e fai mou \_\_\_\_\_, o \_\_\_\_\_ ma \_\_\_\_\_ e sui a'i oe.

#### **A'OA'OGA:**

1. Ia e iloa o lo'o ia te oe le Paia o le Atua, ia e fa'aeteete ona fai.
2. Fa'ataua o tatou valaauina.
3. O le Atua na te lavea'iina ma fa'aola i tatou.
4. E le tu'ulafoa'iina tatou e le Atua.

**PESE:** Le Alii e, le Atua e, le fai mea e mafai. (Pese ma Viiga)

Ia fa'amanatu i le vasega mea nei, Api, Peni ma le Tusi Paia, ia ta'u foi i tamaiti le tusi faitau o le mataupu o lumana'i, o le galuega e fai i le fale o le faitau. Ia saunia e le faiaoga se tatalo e faai'u ai le vasega.

### **IA MANUIA SAUNIGA O LE ASO SA!!**

#### **ASO SA FEPUARI 08, 2026**

**MATAUPU: "TA'UTINOGA FA'AMAONI A RUTA"** (Ruth's loyalty and commitment)

**TUSI FAITAU:** Ruta 1:1-18

**SINI:** Ia a'oa'o tamaiti, e taua le fa'amaoni ia outou ta'utinoga e pei foi o Ruta ma lana ta'utinoga.

#### **FA'AMANATU MO FAIAOGA:**

Talofa lava, malo le soifua manuia, talitonu i le alofa o le Atua ua tatou maua fa'atasi le aso fou e ala i lana tausiga i lo outou soifua ma lo tatou ola. Fa'afetai foi i le ola ma le malosi mai le Atua, e mafai ai pea ona fa'aauau feau ma galuega o lo'o feagai ma tatou. Fa'amalo lava le galulue e tusa ma lo outou valaauina. Ae o le taugologolo lava e tupu ai manatu aua la tatou galuega, o le tusi faitau lava, ia lava sou taimi e su'esu'e ma faitau i ai.

#### **FA'ASOA MO LE MATAUPU:**

O le tala i le ulugalii mai Peteleema o Iuta, o Elimeleka le Tama, a'o Naomi le Tina atoa ai ma le la fanau tama e to'alua, o Ma'alona ma Kilion. Fai mai o le taimi na oge ai le nu'u, na o ai Elimeleka ma lona aiga uma ua nonofo i le nu'u o Moapi. Ina ua oti Elimeleka, na totoe ai lea o Naomi ma lana fanau tama e to'alua. Ua fai ta'ito'alua uma i la'ua i fafine Moapi, o igoa o fafine o Orepa ma Ruta. Sa nonofo pe a ma le sefulu tausaga, ona oti foi lea o Ma'alona ma Kilion e fanau tama a Naomi. Ona totoe lea na o Naomi ma fafine Moapi, o ta'ito'alua o lana fanau tama. Ina ua logo tala Naomi ua asiasi le Alii i lona nu'u, ma foa'i mea'ai ma ua toe maua fa'amanuiaga. Ona toe foi lea o Naomi i lona nu'u o Iuta, atoa ai ma ta'ito'alua a lana fanau tama e to'alua.

Manatua, o Orepa ma Ruta, o fafine Moapi a o lea na o fa'atasi ma Naomi ina ua toe foi i lona nu'u. Peita'i, e le'i faigofie ia Naomi lo latou o ma fafine nei, o lea na ia talanoa loa i ai, e sili ona la foi atu ta'itasi i le aiga o lona Tina, ma ia agalelei le Alii ia te oulua. E le'i faigofie foi ona talia e Orepa ma Ruta upu a Naomi ia la'ua, ma la tali atu i ai, tatou te foi atu lava ma oe i lou nu'u. Na finau pea Naomi ma le alofa i a'i la'ua, ina ia toe foi e lea se aoga latou te o ai e le toe maua ni tama i lona manava ua ia matua foi. Na i'u lava ina toe foi Orepa i lona nu'u ma ona atua e pei ona fai atu ai Naomi le Tina o lona to'alua.

A o i na fai ai loa le ta'utinoga a Ruta ia Naomi e pei ona i ai le tatou mataupu o lenei aso. Fai mai Ruta ia Naomi, 'Aua e te finau ia te a'u ina ia ou tu'ulafoa'i ia te oe, ia le mulimuli atu ia te oe; aua o le mea e te alu i ai, ou te alu ai foi; o le mea e te nofo ai, ou te nofo ai, e fai lou nu'u mo'u nu'u; e fai lou Atua mo'u Atua; o le mea e te

oti ai, ou te oti ai, e tanu ai foi a'u; ia fa'apea ona faia e le Alii ia te a'u, ma ia fa'aopoopo i ai, pe afai e tu'ueseeseina i taua ma oe i se tasi mea se'i vagana le oti.' O le fa'amaoni o le alofa o Ruta ia Naomi, o lo'o aumai ai le ata o le alofa fa'amaoni o le Atua, le alofa e tumau tusa lava po'o a uiga femoumoua'i o le tagata. E le'i fa'apito le vaai a Ruta ia Naomi pe mafaufau foi e le'o sona Tina moni, ae na ia tausii lava ma le fa'amaoni i ai.

E a'oa'o mai pea lenei tala mo tatou, aua o le ta'utinoga fa'amaoni a Ruta, o lo'o fa'amatala ai le Atua alofa na te le tu'ulafoa'iina i tatou o lana fanau. E le fa'atuaioia foi lona alofa, ae tutusa tagata uma i lana silafaga paia. Na te fa'amanuia foi i le tagata e fa'amaoni i ana ta'utinoga e fai e pei o Ruta ia Naomi. Ioe, po'o a lava a tatou ta'utinoga e fai, ia tatou savavali ai foi ma fa'atino ma le fa'amaoni, ona fa'amanuia mai lea o le Atua i a'i tatou.

#### **GALUEGA FA'ATINO: Fesili fa'atupu manatu**

1. O ai le igoa o le to'alua o Naomi?

**Tali:** O Elimeleka

2. A o ai igoa o lana fanau tama?

**Tali:** O Ma'alona ma Kilion

3. O fea le nu'u e omai ai lea aiga?

**Tali:** O Peteleema

4. Aisea na o 'ese ai lea aiga mai lo latou nu'u ae o atu i Moapi?

**Tali:** Ona ua oge le nu'u

5. O le a le uiga o le tala a Naomi na fai i lona nu'u, 'Aua tou te ta'ua a'u o Naomi, a ia ta'ua a'u o Mara?

**Tali:** Aua ua oona mea na faia ia te a'u e Le ona le malosii uma lava.

Fa'afetai tele mo le galuega o lenei Aso Sa, ia ta'u i le vasega le tusii faitau o le mataupu o le Aso Sa o lumana'i. Ia saili ane se pese efetaui ma le mataupu ma fa'ai'u le vasega i le tatalo.

#### **ASO SA FEPUARI 15, 2026**

**MATAUPU: "O LE LOTOGATASI (Unity is)**

**TUSII FAITAU:** Salamo 133

**SINI:** Ia a'oa'o pea tamaiti, i le taua o le lotogatasi ma le nonofo fealofani, aua o le finagalo lea o le Atua mo tagata uma.

#### **FESOASOANI MO FAIAOGA:**

Fa'afeiloa'i atu foi i lenei taeao fou, maualuga pea le viiga i le Atua ona o lana tausiga i lo tatou ola. Fa'amalo foi le fa'amalolosi i feau ma galuega o lo'o feagai pea ma tatou ta'ito'atasi, manatu lava o lo'o gasologa lelei mea uma e ala i le fesoasoani mai o le Agaga o le Atua ia i tatou uma. Ae le tuua lava le fa'amanatu ina ia tautuana lau tapenaga mo le mataupu, ia fa'avagavaga pea lou taimi e su'esu'e ai le tusii faitau ua tu'uina atu.

#### **SINA MANATU MO LE MATAUPU:**

I le Salamo e 133, e i ai le manatu o se Salamo na tusia e Tavita ina ua omai fa'atasi ituaiga uma e sefulu ma le lua o Isaraelu e opogi Tavita e fai ma tupu. E fa'apea le tala e fitu ma le afa tausaga o avea Tavita ma tupu o Iuta, ona fa'atoa a omai fa'atasi ai lea o ituaiga uma e 12 i lalo o lana pule'aga sei'a o'o lava ina maliu Tavita. E le o

fa'amamafa e Tavita i le Salamo lona avea ma tupu. O lo'o fa'amamafa le taua o le nonofo fa'atasi ma le nonofo fealofani, e fa'afoe ai se fa'amoemoe e pei o le fauina o se malo, le fauina o se nu'u, le fauina o se aiga, po'o le fauina foi o se Ekalesia.

Mataulia foi, e le faigofie ona aumai fa'atasi ituaiga uma e sefululua i le vaitau o le filifiliga o tupu mo le malo aufa'atasi o Isaraelu. O ituaiga o Isaraelu e le ni ituaiga na tutupu mai i se fa'avae se tasi. E ui o i latou uma o le fanau e to'a sefulu ma le lua a Iakopo, lea na toe fa'aigoaina e le Atua i le igoa Isaraelu, ae fa usuga a Iakopo na tutupu mai ai le fanau tama lea na avea ma ituaiga o Isaraelu. Leitioa a naunau Tavita e tusi le Salamo lea, ona o le lelei ma matagofie o mea e mafai ona tutupu pe a ola fealofani ma ola fetausia'i tagata uma.

O lo'o fa'atusa e Tavita le matagofie o le nofo lelei ma le nofo fealofani o tagata i le u'u manogi. O le u'u o lo'o ta'ua i le Salamo, o le u'u lea na fa'atonu e le Atua Mose e fausia mai mea manogi tau tele e fa ina ia fa'au'uina ai mea paia ma le atolaau, ma fa'au'u ai ma Arona ma ositaulaga. O le u'u la lea ma lona sasala pe a fa'au'uina ai ositaulaga, fai mai Tavita, e fa'apena le sasala o le manogi o le nofo lelei ma le nofo fealofani, aua o le sasala ua fausia mai mea manogi eseese.

Ona toe fa'atusa foi lea e Tavita i le sau mai Heremoni. O le sau, o le susu o le vaveao e fa'asusu ai lau o laau ma aumai ai fa'amanuiaga i auvae mauga. Fai mai Tavita, e fa'apena fa'amanuiaga ma foliga o le fa'aolataga e maua pe a ola fealofani ma ola fetausia'i tagata. E fa'apea fa'amatalaga o le vaitau o le nofoaigatupu a Tavita, ina ua tu'ufa'atasi ituaiga e 12, o le vaitau e le gata o le malosi ma le mamalu o Isaraelu, ae o le vaitau foi o le ola fa'atuatua o le nuu o le Atua. E leai se malo na mafai ona fa'asagatau atu ia Isaraelu i le vaitau o le aufa'atasi o ituaiga uma e fausia le malo o Isaraelu.

Tamaiti, e le se mea faigofie le ola fealofani ma le ola fetausia'i o mea nei o uso, ma aiga, o nu'u, e o'o lava i totonu o Ekalesia. A o'o ina ta'a le fili ma lamatia le loto lelei, osofa'ia le agalelei ma le fealolofaa'i o tagata, ona tutupu loa lea o maseiga, alia'e foi taua ma fevaevae'iga, ma le alofia ai le toto ma sa'a i totonu o mafutaga.

Atonu o le mea foi lea na a'oa'o ai Iesu i ona so'o. "Ia outou fealofani. E iloa o o'u so'o outou pe a outou fealofani." O le ola fetausia'i ma le ola fealofani, e le se mea fa'aletagata. E le o se atamai foi o le tagata e tupu ai le alofa atu ma le agalelei atu i le isi tagata. Ae peita'i, o le feso'ota'iga o le tagata i le tagata e afua mai le alofa ma le agalelei fa'ale-Atua na te fa'ama'ite i o tatou loto ma agaga.

### **GALUEGA FA'ATINO: Tusiga solo**

1. Tu'u le avanoa i le vasega e tusi mai ai latou Solo (poem), o le ulutala "**O le Loto**" O le faitalia lava o le tamaititi, e fua i ai le tele o lana solo e tusi ai.
2. A uma, ona fa'asolo lea i luga e faitau a latou solo, ma ia togi lelei e faiaoga, ae manaia foi ae saunia i nai fa'aailoga mo le vasega.

### **A'OA'OGA:**

1. E fiafia le Atua pe a lotogatasi ma galulue fa'atasi.
2. 'Aua ne'i pulea e le ita o tatou loto, na o le vevesi e maua mai ai.
3. O le lotogatasi, e malosi ma maopoopo ai so'o se mafutaga.

4. Na o le Atua na te silafia o tatou loto, ma mea uma tatou te faia.

**PESE:** Se mea ina lelei, o uso e fealofani  
Se mea ina lelei, o uso e fealofani  
Fetalai Iesu, ia outou fealofani.

Ia saunia e le faiaoga le tatalo e fa'auma ai le vasega, ma ia toe fa'amanatu i le vasega le suega mo le Aso Sa o lumana'i.

### IA SAUNIA TATOU MO TAPUAIGA O LENEI ASO SA!!

\*\*\*\*\*

**ASO SA FEPUARI 22, 2026**

**MATAUPU: "SUEGA FA'AMANATU"**

**TUSI FAITAU:** Isaia 43:1-7, Ruta 1:1-18, Salamo 133

**SINI:** Ia su'esu'eina atili ai mafaufau o le fanau, ina ia manatua pea mataupu o le Tusi Paia o lo'o a'oa'oina ai pea i latou.

**FA'ASOA MA FAIAOGA:**

Ua tatou o'o mai i le Aso Sa mulimuli o lenei Masina, fa'amalo lava le galulue fa'afetai foi le onosa'i. Viia le Atua ona o lana tausiga le mavae i lo outou soifua ma lo tatou ola, manatu ai o lo'o tumua'i tutusa ai tatou uma i lona alofa. Ae mo le tatou suega fa'amanatu, e taoto atu lava le fa'atinoina i faiaoga. Ua saunia lava a tatou fesili, ae le vaoia ai la outou fa'atofala'iga i nisi auala mo le lelei e sili atu ae a tatou fanau.

**FA'ATINOGA O LE SUEGA: Fesili ma Tali**

1. O le a le igoa na valaauina ai le nu'u o le Atua i le amataga?

**Tali:** O Isiraelu

2. O ai na osi feagaiga ma Isiraelu?

**Tali:** O le Atua

3. O le a la le feau a le perofeta o Isaia mo le nu'u o le Atua?

**Tali:** Ia latou manatua le na valaauina i latou i lona lava igoa, o le Atua lea.

4. I se isi va'aiga i le tusi lenei o Isaia pe a faitauina, o le a le vaega lea e i ai le mataupu e 43?

**Tali:** O le vaega lona lua

5. O le a le finagalo o le Atua mo lona nu'u filifilia?

**Tali:** O le finagalo o le Atua, ia aua ne'i fano ona tagata a 'ia fa'aolaina ma lavea'ina.

6. O le a le ta'utinoga a Ruta na fai ia Naomi le Tina o lona to'alua?

**Tali:** O le mea e te alu i ai, ou te alu atu ai foi, o le mea e te nofo ai, ou te nofo ai foi, e fai lou nu'u mo'u nu'u, e fai foi lou Atua mo'u Atua, o le mea e te oti ai, ou te oti ai foi.

7. O ai le igoa o le to'alua o Naomi?

**Tali:** O Elimeleka

8. A o ai igoa o fafine Moapi lea na nonofo ai le fanau tama a Naomi?

**Tali:** O Orepa ma Ruta

9. O ai igoa o le fanau tama a Elimeleka ma Naomi?

**Tali:** O Ma'alona ma Kilionā

10. O le a se a'oa'oga sa e maua mai i le ta'utinoga fa'amaoni a Ruta?

**Tali:** E fa'amaoni le alofa o le Atua mo i tatou uma o lana fanau.

11. O le a se tala a le fai-Salamo e tusa ma le mataupu, 'Lotogatasi'?

**Tali:** O se mea e matua matagofie, a e omai fa'atasi ma mafuta fa'atasi o fanau a le Atua.

12. O le a se ata o lo'o fa'atusa i ai e le fai-Salamo, le lotogatasi?

**Tali:** O le ata o le Atua e mafuta ma auai mai i lana fanau i taimi uma.

Fa'afetai mo le galuega o lenei aso, ia agalelei le Atua ma fa'amanuia atu. Ia saili ane se pese, ma fa'ai'u le vasega i le tatalo. Ia Ta'u le tusi faitau o le mataupu o le Aso Sa o lumana'i, o le galuega e fai i le fale.

### IA MANUIA TELE LE ASO SA!

---

#### ASO SA MATI 01, 2026

**MATAUPU: "O LE MANA O LE TALA LELEI"** (The power of the Gospel)

**TUSI FAITAU:** Roma 1:1-17

**SINI:** Ia mae'a le mataupu, ua malamalama le fanau i le malosi o le mana o le Tala Lelei.

#### FA'AMANATU MO FAIAOGA:

O le mana o le tala lelei, e mafai foi ona una'ia ma fa'alautele e le tatou galuega fa'afaioga Aso Sa. O le uiga o le manatu, ia fa'atino lava la tatou galuega i le mea e gata ai lo tatou mafai, ae fa'alagolago mea uma i le agaga o le Atua e fesoasoani mai. Fa'afetai tele le fa'amalolosi i lo outou valaauina, o le taugologo lava ina ia tautuana lau tapenaga mo le mataupu, ia lava le taimi e mafuta ai ma le tusi faitau. Ia manuia le tapenaga.

#### FESOASOANI MO LE MATAUPU:

Mo Paulo lava ia, o Iesu Keriso o le Talalelei na mua'i folafola e le Atua ia Aperaamo, a o le'i tu'uina mai e le Atua le tulafono. Ma o lo'o molimau foi i ai le tulafono ma le au perofeta i lea folafolaga fa'a-feagaiga a le Atua, ua fa'aalia ai lana amiotonu ma lona fa'amaoni i ana folafolaga. O le amiotonu a le Atua, o le tasi lea suafa e fa'asino ia Iesu Keriso. O le fa'amoemoe fa'aola o le Atua e mana'omia ai se Isaraelu faamaoni na te faataunuaina. Ma ua aumai ai e le Atua lona Alo, ma ia ofoina atu i le Atua le faamaoni ma le fa'atuatua na le olaina e Isaraelu. O le fa'atuatua la ia Iesu, o le maua lava lea o le amiotonu a le Atua.

O le tatou mataupu, O le mana o le Talalelei' o le mana ma le malosi lea na liliuina atoa le olaga o Paulo ma avea ai ma aposetolo e talai le talalelei ia Iesu Keriso. O le afuaga foi lea o lana tusi i le Ekalesia i Roma, ina ia malamalama ma manino tagata i le uiga moni o le talalelei ma le malosi o le mana o le talalelei. O le talalelei, o tala o le Keriso toetu po'o le Keriso manumalo. O Paulo, o le auauna a Iesu Keriso, na valaauina e fai ma aposetolo, ua ia te ia foi le mana e fai ai lana galuega talai. E talitonu Paulo, o le toetu mai o Iesu nai e ua oti, ua ia maua mai ia te ia le alofa tunoa ma le faiva o le aposetolo. O le uiga foi lea o lana tusi, ina ia maua e tagata uma le alofa tunoa ma le manuia mai le Atua, atoa ma le Alii o Iesu Keriso.

O le tusi a le aposetolo, ona o lona naunau e fia feiloa'i atu ma avatu se meaalofa o le agaga, ina ia fa'atumauiina ai le fa'atuatua o tagata, e ui ina naunau le loto e fia feiloa'i, ae o lo'o i ai mea o lo'o taofia ai. O lona uiga, i le manatu o le aposetolo, po'o a lava mea o lo'o tutupu i ia ona po, ae fai mai a ia, 'ou te le ma i le tala lelei ia Keriso; aua o le mana lava lea o le Atua e ola ai i latou uma o e fa'atuatua, e muamua le Iutaia, atoa ma le Eleni. Aua ua fa'aalia mai ai le amiotonu a le Atua i le fa'atuatua, ina ia fa'atuatua ai, pei ona tusia, E ola le tagata amiotonu i le fa'atuatua.'

Ioe, o le mana o le tala lelei lea ua faa-talaleleiina ai tatou uma o e ua fa'atuatua ma talitonu i le Keriso toetu. O le fesili, o ai e fa'aauauina ma fa'alautele le tala lelei, o le tali o tatou, ia tatou fiafia e tala'i atu le tala lelei mo e o lo'o pogisa pea i faiga a le fili ma ana 'au. O le tatou fa'atuatua i le mana o le tala lelei po'o le Keriso manumalo, lea ua fa'asa'oloto mai ai tatou mai le pologa o le agasala.

### **GALUEGA FA'ATINO:**

1. Ia fetufaa'i ma le vasega i nisi uiga o le mataupu sa fa'amatalaina, ia fa'asoa mai foi o latou manatu e tatala atili ai o latou mafaufau, ma fa'alautele ai pea le a'ano moni o le tala mai le Tusi Paia.
2. Ae le tuua ai lava le fai o ni fesili e fa'aosofia ai o latou manatu, ma 'ia aua ai ne'i taofiofia o latou lagona e fa'asoa fa'atasi ai ma faiaoga.

**PESE:** Uso e, talavou o le feagaiga fou

Vaai le vasa ua sousou.

Tu'u i luga lau lamepa, aua ne'i tineia

Loto tele ou te le faia'ina.

**TATALO:** Fa'afetai tele le Atua i lau talalelei ua fa'atalalelei ai i matou, ia a'oa'o mai pea ia matou loto tetele e fa'aauauina pea, ma ia viia ai pea lau afio e fa'avavau. Fa'amagalalo i matou le fanau agasala. Ona o Iesu la matou Iesu sili. Amene.

### **IA MANUIA SAUNIGA O LE ASO SA!!**



**ASO SA MATI 08, 2026**

**MATAUPU: "MALAIA MAI LE FA'ATOAGA"** (Banished from the garden)

**TUSI FAITAU:** Kenese 3: 8-24

**SINI:** Ia malamalama tamaiti, i le ulua'i oia o le mafutaga a le tagata ma le Atua na foafoaina mea uma o le lalolagi.

### **FESOASOANI MO FAIAOGA:**

E fa'atalofa ma fa'afeiloa'i atu foi i lo outou mamalu. E ao pea ona tatou fa'afetaia le agalelei silisili ese o le Atua, ua aumai ai lo outou soifua ma lo tatou ola i lenei aso ua tatou aulia ma le manuia. Malo lava le fa'amalolosi i o outou tiute ma faiva masani, manatu foi o lo'o manuia mea uma, aemaise o lo outou soifua tulu'i mai le Atua. Ae o le tu'utu'u laau fa'amanuiti atu lava, ina ia tautuana lau tapenaga mo le mataupu, ia lava lou taimi ma le tusi faitau e su'esu'e ai. Ia agalelei le Atua i lau tapenaga.

## SINA FA'ASOA MO LE MATAUPU

O le tatou mataupu o lenei aso e tusa ai ma le tusi faitau, o le tala i le foafoaina o le lalolagi, o le tala i le fausiaina e le Atua o feso'ota'iga; o tala o le fausia e le Atua o mafutaga ma faia e nonofo lelei ai mea uma; o tala i le fausiaina e le Atua o vafeagai. O tala o le foafoaga, o tala i le va feagai o le Atua ma le tagata na ia faia; o tala o le va feagai o le tane ma le ava; o le va o le tagata ma isi mea o le foafoaga. O le manatu aoao tetele lea o tala o le foafoaga. O le vaega la lea sa tatou faitauina, o le tala o le oia o le va feagai; o le tala o mafutaga ua masofasofa ma afaina ai le va feagai.

O le uiga la lea o le tala. O le tala e fa'amatala mai ai ia i tatou, a oia le va feagai, ma motusia mafutaga mafana, ona faoa lea o fa'amanuiaga e tataua ona maua. A masofasofa feso'ota'iga lelei, ona aveesea lea o meaalofa mai le lelei o le Atua e tataua ona maua e lana foafoaga na fai. Manatua foi, o tala o le foafoaga, o tala o le lelei ma le matagofie o le Atua na ia faia ai mea uma e o'o lava i le tagata. Sa gaoioi le Agaga o le Atua e fai mea uma e tusa ma lona finagalo. A mafuta fa'atasi le Atua ma le tagata, ma mea uma na ia faia, ona tumau lea o manuia ma le lelei o le Atua. Ae a fete'ena'i, ma fefulituaa'i, ma le feso'ota'i lelei mea na faia e le Atua, ma le ususita'i mea na faia i le finagalo o le Atua, ona faoa lea o fa'amanuiaga ma mea lelei na foa'i mai e le Atua.

O le ulua'i tala lea o mafutaga oia, o le ulua'i tala o feso'ota'iga motusia, ma so'otaga ua fefulituaa'i ma ua lu'itauina ai le lelei o le Atua. O le tatou mataupu la o lenei aso, se'i o tatou va'ava'ai i vaivaiga e alia'e mai i totonu o mafutaga ma oia ai le va feagai. O lo'o ta'ua i le tala le i ai o fa'aosoosoga, ma le i ai o le fa'aosoosoina e lu'itauina ai olaga o tagata.

O fa'aosoosoga, o lu'itau ia mai fafo atu o le tagata, e pei o fa'aosoosoga a le gata i le fafine. A faitau lelei i le tala lenei, o lo'o atagia ai fa'aosoosoga eseese o lo'o taufa'asoga ai e le gata le fafine. Fa'aosoosoga o le ese o le iloa o le Atua mai le iloa o le tagata, fa'aosoosoga o le ese o le atamai o le Atua mai le atamai o le tagata, fa'aosoosoga o le ese o le malosi o le Atua ma le malosi o le tagata. O fa'aosoosoga uma nei ua la'u e le gata i le fafine e fai ma fa'aosoosoga ia te ia, e foliga mai ai ua le amanaia e le Atua le tagata.

## GALUEGA FA'ATINO: Ia vaelua le vasega, ona fa'asoa lea i fesili nei.

### Vaega 1: Kenese 3:8-13

1. O ai le fa'amasino i le Tala?
2. O a moliaga i le fa'amasinoga, ma o ai na molimau ai?
3. O le a le mea ua tupu i le ulua'i tagata ua mafua ai ona fa'amasinoina?
4. O a nisi uiga leaga o le ulua'i tagata e 'ese mai le le usita'i?

### Vaega 11: Kenese 3:14-24

1. O ai na muamua fa'asala, ma o le a lona fa'asalaga?
2. O a fa'asalaga o le ulua'i tagata?
3. O ai o lo'o fa'asino i ai na te tu'imomomo le ulu o le gata?
4. O a a'afiaga o le fa'asalaga o le agasala a le ulua'i tagata ma le foafoaga?



E tolu fa'aupuga taua o lo'o fa'amamafa e le Atua i lana fetalaiga lea i lona nuu. Muamua, Ia oe, ne'i galo ia te oe. E ala ona galo se mea i le tagata soifua on aua le nofo i le mafaufau ma le loto. O nofoaga aupito fa'asese tagata ia o le tagata soifua. O le mafaufau ua le aoaoina ma le fa'amanatuina, ma le loto ua solomuli ma ua fulitua. Afai e le fai sooa ma le fa'amasania le olaga o le tagata soifua i se mea e tataua ona fai, ona tupu loa lea o le vaivaiga lea o le galo. O le galo la, o se vaivaiga fa'alemafaufau ma le vaivaiga fa'aleloto o le tagata soifua.

E le fou le vaivaiga lea i tagata Isaraelu. E tiga lava ona fa'ailoa ma fai vavega le Atua i tagata Isaraelu, ae o ni tagata e galo gofie i o latou mafaufau ma o latou loto le Atua na latou osi feagaiga. O le mea lea na ala ai ona fa'atonu e le Atua lona nuu, fai mai, "Ia i ai foi i lou loto upu nei ou te fai atu ai ia te oe i le aso nei. Ia e matua a'oa'o so'o ai i lau fanau, ma ia e tautalatala a'i, pe a e nofo i lou fale, pe a e savali i le ala, pe a e taoto, pe a e tula'i foi. Ia e fusi ai e fai ma fa'ailoga i lou lima, e avea foi e fai ma pale i le va o ou mata. Ia tusi ai foi i pou o lou fale, atoa ma ou puipui.

Lua, "O le mea sa nofo pologa ai." E i ai tagata e masani ona matamumuli i o latou taimi tuana'i po'o ni vaivaiga foi sa latou feagai i tausaga ua mavae. Ae le fa'apena le finagalo o le Atua i lona nuu o Isaraelu i lo latou nofo pologa i Aikupito. O le toe fa'amanatu a le Atua ia Isaraelu, ia aua ne'i fa'atuatuaana'i i ou taimi o le pologa, aua o iina e a'oa'o mai ai le tamaoaiga ma le oa o le Atua ua ia foa'i ma agalelei mai ai i lo tatou ola.

Tolu, "O le Alii na na aumaia oe." O le fetalaiga lea a le Atua, o lo'o fa'atatau i le aao lavea'i, le aao foa'i, le aao leoleo, le aao fafaga ma fa'ainu. O lo'o fa'atatau i le va fealoaloa'i ma le va feagai na osi feagaiga ai le Atua ma lona nuu filifilia. O lo'o fa'atatau i fa'aaliga o le Atua alofa, le Atua sa mua'au ma muli'au, ma le Atua sa fai vavega ma ia fa'aola i lona nuu.

**GALUEGA FA'ATINO: Tusiga tala**

- 1. Ia tu'u le avanoa i le vasega e tusi mai ai ia le silia ma le lua i le tolu parakalafa le tala e fa'atatau i lona lava olaga i totonu o lona aiga.
- 2. Ia atagia i le tala se a'oa'oga mai le mataupu sa fa'amatalaina.

**A'OA'OGA:**

- 1. Ia manatua le alofa lavea'i o le Atua.
- 2. O le ola usita'i ma fa'alogu, e manuia ai lou olaga.
- 3. 'Aua ne'i fiu le a'oa'i ma le fautua a matua i fanau.

Fa'afetai mo le galuega o lenei Aso Sa, ia fa'amanuia tele le Atua e tusa ma lo outou tautiga. Ia saili ane se pese ma tofi se tama e fa'ai'u le vasega i le tatalo.

**IA MANUIA LE ASO SA!!**



**ASO SA MATI 22, 2026**

**MATAUPU: "AGA'I I LE POGISA" (Towards the Darkness)**

**TUSI FAITAU: Mataio 16: 21-28**

**SINI: Ia malamalama le vasega e silafia e Iesu mea uma e aga i ai lana galuega ma le taunuuga o mea uma.**

**FESOASOANI MO FAIAOGA:**

Malo afua ailao ua maua i le alofa ma le agalelei o le Atua, manatu lava o lo'o tatou maua fa'atasi lenei aso fou i le manuia mai ia te Ia. Fa'amalo foi le pale i faiva ese'ese ua valaauina i ai lo outou soifua ma lo tatou ola. O le

tatou fa'amanatu masani lava, ua ia te outou lava le silafia o le tatou galuega, ae o le atoaga lava o lau tapenaga, ia lava le lua mafutaga ma le tusi faitau o le mataupu. Ia manuia tele le tapenaga.

### **SINA FA'ASOA MO LE MATAUPU:**

O le tatou mataupu i lenei taeao "Aga'i i le pogisa" o le vaega o le tala sa tatou faitauina, o lea ua fa'ailoa e Iesu i ona soo, e tatau ona ia alu i Ierusalem. O le finagalo o le Alii, e ao lava ona nofo malamalama ma iloa e lona 'au soo mea uma e tutupu ao le'i tu'ua e Ia i latou. O lona uiga, e ao lava ona saunia lona 'au soo i taimi uma. O le valoaga a Iesu ua ia faailoa i ona soo le mea e taunuu i ai lana galuega. O lana galuega e aga'i i le pogisa, a'o tua atu o lo'o i ai le faamoemoe fou mo le galuega fa'aauau a lona 'au soo. Ua o'o i le taimi e tatau ai ona fa'ailoa i soo o Iesu, ma silafia foi e Iesu le so'o ua tapena mo lona valaauina.

Ta'ua e Mataio, o le taimi lava na fa'ailoa atu ai e Iesu i ona soo, e tatau ona ia alu i Ierusalem, e fa'atigaina foi i mea e tele e toeaina ma le au ositaulaga sili, ma le au tusiupu, e fasiotia foi o ia, e fa'atuina foi o ia i le aso tolu. Na tali ane Peteru ma ia fa'apea, "Le Alii e, ia mamao ia te oe lea mea, e le o'o lona mea ia te oe." Ona faliu lea o Iesu ma fa'apea atu ia Peteru, "Satani e, ina alu ia oe i o'u tua, ua fai oe ma mea ou te tausuai ai; aua e le o mea a le Atua ua e loto i ai, a o mea a tagata."

Silafia lelei e Iesu le mea o lo'o i le loto o Peteru, e na ona tautala i upu fa'afoliga, ae le o i ai lona loto. Ae o le pogisa lava lea e tasi o lo'o fa'ama'i pipisi i le au so'o o le Alii, e tiga lava ona mafuta ma va'ava'ai i vavega ma fa'alogo i a'oa'oga a Iesu, ae ola masalosalo lava. O uiga ia o lo'o taumafai Iesu ia fa'afitia e ona soo, ona mafai lea ona ta'ua ma soo moni e mulimuli ia te Ia. O le avea o le tagata ma soo o Iesu, e tatau ona ofo atoa le ola, o lona uiga, ia tuua e ia mea uma e pei ona masani ai, ona mafai lea ona amo le satauro o Keriso. O le aga'i i le pogisa e pei ona aumai i le tala, o le aga'i o le Alii i ona puapuaga se'ia o'o lava ina maliu. E pei lava ona ia fa'ailoa i ona so'o, aua e tatau ona latou iloa ma malamalama i ai.

O le fa'ailoa a Iesu i ona soo, ia fai i ai le filifiliga a le soo pe fia mulimuli pe leai. O le avea ma soo mulimuli, e ofo le ola, o lona uiga e tatau ona tigaina, e le o se mea faigofie. O le soifua ofoina o Iesu, sa fai ma fa'aolataga mo le lalolagi agasala. Na puapuagatia ma fa'atigaina, na o'o i le satauro, na maliu ma tanumia i le tuugamau, ae na toetu manumalo, ua tatou manumalo fa'atasi ai ma Ia e fa'avavau.

### **GALUEGA FA'ATINO: Fetufaa'iga**

1. Ia fetufaa'i ma le vasega, ia tatala mai foi o latou mafaufau e fesili ma fa'amatala mai ni o latou foi lagona e tusa o le tala.
2. Ia fai foi e le faiaoga ni fesili fa'atupu manatu mo le vasega, e tatala atili ai ma fa'alauatele le mataupu.

### **A'OA'OGA:**

1. E silafia e Iesu mea uma o lo'o i tatou loto.
2. O le avea ma so'o moni e mulimuli ia Iesu, o le ola ua ofo atoa mo le galuega.
3. Ia ola tapena ma sauni i so'o se taimi o le savaliga.

**PESE:** Ua ou filifili, e mulimuli ia Iesu x2

Ou te le toe foi, ou te le toe foi.

Ia tofi ane se tama'ita'i e fa'ai'u le vasega i se tatalo.

## **IA MANUIA LE ASO SA!!**



**ASO SA MATI 29, 2026 (Aso Sa Laupama)**

**MATAUPU: "MALOSI MA LE AUAI" (Force and presence)**

**TUSI FAITAU: Mataio 26: 36-56**

**SINI:** Ia mae'a le mataupu ua malamalama le vasega, o le malosi sa ia Iesu, ona sa auai ia te Ia le Agaga o le Atua.

### **FESOASOANI MO FAIAOGA:**

Ua tatou o'o mai i le Aso Sa mulimuli o lenei foi Masina, malo lava le tauata'i fa'afetai fai o le faiva. Tatou fa'afetai a'e i le Atua e ou le malosi ma le pule uma lava, ua mafua ai ona tatou maua le ola i lea aso ma lea aso.

Ua tatou i ai foi i lenei vaitau, tatou te mafaufau loloto ai i puapuaga sa feagai ma lo tatou Alii o Iesu Keriso sei'a o'o atu i lona maliu. E ao ai lava foi ona tatou toe mafaufau i lo tatou ola valaauina po'o fa'apefea mai. O le mea lea, ia lava lou taimi e faitau ai ma su'esu'e le tatou tusi faitau ua tu'uina atu mo le mataupu.

### **NAI MANATU MO LE MATAUPU:**

O le tatou tusi faitau o lo'o aumai ai le tatou mataupu o lenei taeao, e tolu vaega o tagata o lo'o manino mai le tatala. E tolu lava le vaega ia ma le latou fa'atinoga e tusa ma a latou lava filifiliga sa'oloto; ae o lo'o fai uma i le nofoaga e ta'ua o Ketesemane, le nofoaga e tu'u eseese ai le otaota o le olive ma le suauu mai le olive.

Muamua, o Iesu ma lana tauiviga e tusa o lona valaauina e lona Tama e fai ma fa'aola o le lalolagi. Le tauiviga na atutolu ai le tatalo a Iesu i lona Tama "Lo'u Tama e, afai e mafai, ia e aveese lenei ipu ia te a'u; ae aua le faia lo'u loto a o lou finagalo." O lea ua amata le fa'auuina o le tupu o le malo o le Atua, o le Mesia na valo'ia.

Lua, o le ausoo lea na fetalai i ai Iesu ina ia "tatou mataala fa'atasi ma a'u." E fa'atolu lava ona foi ane Iesu mai lona tatalo i lona Tama, ae o lo'o momoe lava ona soo. Ina ua pu'eina Iesu, ona fai mai lea o le molimau a Mataio. "Ona tuua ai lea o ia e le ausoo uma, ae sosola i latou (f.56). Mai le tele o a'oa'oga a Iesu i ona soo a o latou mafuta, ae o lea ua pu'eina Iesu, ae sosola ese ona soo.

Tolu, o e na fa'alataina ma pu'eina Iesu. O lo'o ta'ita'i mai e Iuta le Sekara le vaega lea. Ua fa'alataina e Iuta Iesu, ma ua latou pu'e ia te Ia. O i latou ia na fetalai i ai Iesu. "Ua outou omai ea ma pelu ma uatogi e pu'e mai ia te a'u, peiseai o se faomea?" O i latou ia o lo'o fai ma ave feau a le au ositulaga ma le au tusiupu. O lea ua latou fa'atinoina le taupulepulega leaga na fai i le fale o Kaiafa le osi taulaga sili.

O mea uma nei o lo'o tutupu i le nofoaga lea e ta'ua o Ketesemane. E foliga mai ua tu'ulafoaiina Iesu e lona Tama. Ua tu'ulafoa'i foi e ona soo. Ma ua pu'e ma saisai e tagata na latou taupulepuleina lona oti. E le o ia i tatou se malosi ma se gafatia tatou te mataala ai na o i tatou i taimi o puapuaga ma faigata. Se'i vagana ua tatou au fa'atasi ma Iesu ona fa'atoa tatou manumalo lea i fili ma faigata o le olaga nei.

A o'o ina mamao i tatou ma lagona o'otia o Iesu ma lona alofa tunoa ua ofoina mai, e mafai lava ona tatou fa'alataina pea, ma pu'e pea Iesu e pei o se fao mea. O o tatou uiga fa'afiaamionu, ma o tatou talitonuga fia mama i luma o le Atua, o lo'o i ai le malosi tatou te fa'atigaina ma fa'apagotaina ai pea Iesu. Po'o le a lava lo tatou latalata ma lo tatou feasogi pea ma Iesu i aso uma, ae peita'i, a le suia lava o tatou loto ma o tatou agaga

tatou te talia ai lana fa'aolataga, e avea pea i tatou ma auauna a le tiapolo e fa'ataunuu ana fuafuaga leaga. O tagata ia na o ane e fa'alata ma pu'e Iesu, o auauna ma tagata o lo'o galulue i lalo o taupulepulega leaga a ta'ita'i o le lotu Iutaia, le au osi taulaga ma le au tusiupu.

O tagata o lo'o ola i le olaga fa'apologaina, aua o lo'o fa'atonutonuina a latou fa'atinoga e pulega leaga. E leai lava so latou sa'olotoga e fai ai le mea o lo'o i o latou loto ma agaga. O le vaivaiga foi lea na o'o i ai Iuta, aua ua fa'atino o lo'o fa'atinoga i o foina atu lona ola i taupulepulega leaga a le tiapolo ma ua avea ma ala ua matua tau mamao ai lava Iuta mai le fa'aolataga.

### **GALUEGA FA'ATINO: Fa'atino le tala**

1. Ua tatou masani i le Aso Sa lenei, e fa'atino ai le malaga fa'a-tupu a Iesu i Ierusalem. Ae manaia foi ae sui i se isi vaaiga, o le uiga o le manatu. O se vaaiga fa'aonapo nei, e pei o le fa'ataliga o se tupu mai se isi malo pei o Peretania, Amerika ma isi. Ae auga uma lava i le malaga fa'atupu a Iesu.

Fa'afetai mo le galuega sa feagai ai o lenei Aso Sa, ia saili ane se pese ma fa'ai'u le vasega i le tatalo e saunia e se tama'ita'i.



### **ASO SA APERILA 05, 2026 (ASO SA O LE ESETA)**

**MATAUPU: "E MONI LE TOETU"** (Risen indeed)

**TUSI FAITAU: Mataio 28: 1-20**

**SINI:** Ia iloa e tamaiti, le molimau a le tusi o Mataio i le toetu o Iesu, ma e le fesiligia le moni o le toetu.

### **FA'AMALOSI MO FAIAOGA:**

E fa'atalofa atu foi i lenei taeao fou, taeao o lo'o tatou fa'amanatu ai le toetu manumalo o lo tatou Alii o Iesu Keriso. Malo le soifua manuia, fa'afetai i le Atua i lana pui puiga malu i lo outou soifua ma lo tatou ola. Talitonu lava o lo'o tatou maua fa'atasi lenei aso fou i lona alofa tausii mai. Ae le tuua ai lava le fa'amanatu atu pea, ina ia tautuana lau tapenaga mo a tatou mataupu, o le tusi faitau lava e nanea ai lau fa'asoa, ia lava pea lou taimi e faitau ai. Ia manuia tele le tapenaga.

### **FESOASOANI MO LE MATAUPU:**

O le tatou faitauga o lenei Aso Sa, o le molimau a Mataio i le mea na tupu i le aso tolu talu na malii Iesu, le aso na toetu mai ai Iesu mai le oti ma le tuugamau. Ma o le Aso Sa la lenei, o lo'o fa'amanatuina ai e Ekalesia Kerisiano uma i le lalolagi atoa le toetu o Iesu. E leai lava se Ekalesia Kerisiano na te fesiligia le moni o le toetu mai o Iesu Keriso. O le ogatotonugalemu lea o le fa'atuatuaga Kerisiano. O le malii ma le toetu manumalo mai o Iesu Keriso mai le oti ma le tuugamau.

Ana leai se toetu, e leai foi se fa'atuatuaga Kerisiano. Ana leai se toetu, e leai se talaiga o le alofa tunoa ma le fa'aolataga a le Atua mo le tagata agasala. Ua avea le toetu mai o Iesu Keriso ma fa'amoemoe ola o le tagata agasala i le ola fa'avavau fa'atasi ma Iesu Keriso i lona malo.

E taua tele la le Aso Sa lenei i le fa'atuatuaga fa'akerisiano. O le Aso Sa na liliu ai e le Atua le fa'anoanoa o le malii ma le fa'asatauroina o Iesu, i le fa'atuina mai e le Atua o Iesu mai le oti. O le Aso Sa na tatala ai e le Atua

puipui o le tuugamau pogisa, ae fa'asusulu mai le malamalama o le ola fou. O le Aso Sa na toe fa'apotopoto ai e Iesu ona soo na sosola, ina ia avea i latou ma ave feau i lona toetu mai.

O feau loloto ma le fa'amalietoto ia o lo'o afifi i le Aso Sa lenei, ua ta'ua o le Aso Sa toetu. O le toetu o Iesu Keriso, o le fa'atinoga e afua mai i le finagalo alofa o le Atua mo le tagata ua fa'aolaina. E to'atele lava tagata o lo'o latou faia pea fete'ena'iga i ni molimau o le toetu o Iesu. O lo'o latou tau saili ni molimau maumaututu pe na fa'ape'i ona toetu mai Iesu. Ta'atia ia le taliina o le fesili pe na fa'ape'i ona tupu, a o le mea mautinoa lava i ni molimau a le au apusetolo, o le toetu lava ia, e le o se fa'atinoga a se tagata, e le fuaina foi i ni fa'amaoniaga a ni tagata, ae o le fa'atinoga lava a le Atua na fai e le Atua e tusa ma fuafuaga atamai fa'ale-Atua. O le fa'aauaina lea o le alofa tunoa o le Atua i le tagata agasala ina ia le gata i le oti lona fa'amoemoe, a ia tau lava i le malo o le Atua na aumai e Iesu. Na amata i le Atua le ola, e fa'ai'u foi i le Atua le ola e fa'avavau. E le fa'ai'u i le oti ma le tuugamau.

E tusa ai ma le molimau a Mataio, po'o le a foi le mau o le fa'amauiina o le gutu o le tuugamau e le lotu Iutaia ma le malo Roma, ae o le mafui'e na lulu na tatalaina ai le gutu o le tuugamau. O le agelu foi mai le lagi na ia momoliina mai le tala o le toetu o Iesu. E le o se tala na fa'atupuina e ni tagata, ae o le avea'i na momoli mai le lagi. E le o se mea na tupu i le ma'ema'e o le tagata, ae o le mea na tupu ona o le finagalo alofa o le Atua. E le o se malosia o se tagata, ae o le mamana o galuega a le Atua na te fa'atinoina ai lona lava finagalo alofa i tagata.

### **GALUEGA FA'ATINO: Fesili ma Tali**

1. Aisea ua le avea ai le oti ma muta'aga i mea uma i le ola o le tagata?

**Tali:** Aua o le oti, o le amataga fou lea i le soifua o le tagata fa'atuatua, e mafai ai ona fa'aolaina ma fa'aliliuina e Iesu i le ola fou i le fiafia e fa'avavau.

2. O le a se molimau a Mataio e uiga i le toetu o Iesu Keriso?


**Tali:** E le o se tala na fa'atupuina e ni tagata, ae o le avea'i na momoli mai le lagi.

3. O a ni a'oa'oga ua e maua mai i le tala o le toetu e pei ona fa'amatalaina? (tu'u le avanoa e tali mai ai le vasega)

**PESE:** God's not Dead, He's alive x 3  
I feel Him all over me.

**TATALO:** Le Atua e, ia 'e fa'atumuina i matou i lou alofa, ina ia mafai ona matou alolofa atu i o matou tuaoi o lo'o puapuagatia. Amene.

### **IA MANUIA LE ASO SA TOETU!!**



**ASO SA APERILA 12, 2026**

**MATAUPU: "O LE LAULAFAIVA MIMITA"** (The boastful tongue)

**TUSI FAITAU:** Salamo 12: 1-4

**SINI:** Ia a'oa'o atu, ia malamalama le vaega i le uiga o le laulaufaiva mimita o lo'o ta'ua i le tusi faitau.

**MANATU MO FAIAOGA:**

O lo'o tatou i ai pea i le vaitau o le toetu o lo tatou Alii o Iesu Keriso. Ae manatu foi o lo'o tatou maua fa'atasi lenei taeao fou i le agalelei mai o Iesu toetu. Malo le folau manuia, fa'afetai foi le fa'amalolosi i tiute ma faiva o lo'o feagai pea ma outou. Talitonu foi o lo'o sologa lelei le fa'atinoina o la tatou galuega, malo lava le onosa'i. O

le tu'umumusu lava a le Ofisa mo le manuia o la tatou galuega. O le tusi faitau lava, ia fa'avagavaga pea lou taimi e su'esu'e ai. Ia manuia le tapenaga.

### **FA'ASOA MO LE MATAUPU:**

O le Salamo sa faitauina, o lo'o aumai ai le laulaufaiva e tautala i mea fa'asausili. O le tatalo a Tavita i e o lo'o agatele mai. Fai mai a ia, 'Le Alii e, ia e fa'aola mai; aua ua uma tagata amio Atua; aua ua mavae e ua fa'amaoni nai le fanau a tagata.' Ua tautala le fai-Salamo i uiga o tagata na feagai ma ia i lana savaliga i ona foi taimi. Na feagai ma tagata leaga, tagata e tautalatala i laugutu molemole ma le fa'alotolotolua. O fa'afitauli ia ma faigata na fesaga'i ma le fai-Salamo, na afua matagi ai lana tatalo atu i le Atua ina ia fa'aola mai ia te ia. E le faigofie le savaliga na feagai ma Tavita i le fa'atinoina o ona faiva fa'ata'ita'i, aemaise lava i uiga ma amioaga a tagata.

Fai mai a ia, ua mavae atu tagata amio Atua, o lona uiga o taimi o le tupulaga fou, o tagata latou te le'i lagonaina le faigata na tauasa mai i le amataga, e le'i tofo i faafitauli na savalia mai e o latou tua'a ua mavae. O i latou nei ua ola ane ma fai mai o lo latou malosi lava na maua ai manuia, ua latou tautala faasausili, ma ua latou manatu o latou laulaufaiva latou te manumalo ai ma faapea ifo, o ai ea so tatou alii?

Ua manatu le fai-Salamo, na o le Atua lava na te maua ai le fesoasoani, o ia foi na te ave'ese uiga fa'amauualuluga o tagata. A o uiga foi ia ma amioaga a le nuu o le Atua, ina ua seei i fa'amanuiaga e tele mai le Atua. Ua na ona taulagi o lo latou Atua, ae ua fai lava le mea e loto i ai le tagata ia. Ua pesia i uiga o malo tuaoi po'o nuu fa'apaupau, latou te leiloa le Atua, ma ola fa'afoliga.

O le laulaufaiva mimita, e fanau mai ai le fa'amauualuga, le fa'asausili ma le fa'alotolotolua, ma fa'atupu ai vevesi ma misa i le va o tagata. E mafai e le laulaufaiva mimita ona talepe ma fa'aleaga mafutaga ua maopoopo ma mafanafana. O le malosi o le laulaufaiva, e mafai ona ola ai le tagata, e mafai foi ona oti ai le tagata. Ae fai mai le fai-Salamo, e vavae ese e le Alii o laugutu molemole uma lava, ma le laulaufaiva e tautala i mea fa'asausili. O lona uiga e le fiafia le Atua i le tagata e atagia ai uiga e pei ona ta'ua. O le feau foi lea mo tatou, ia tatou 'aloalo ese ma uiga leaga e pei ona aumai e le fai-Salamo, a 'ia amio lelei ma usita'i i le Atua ma matua, ona manuia lea o lou olaga i aso uma.

### **GALUEGA FA'ATINO: Fesili fa'atupu manatu**

1. O se mea lelei le laulaufaiva mimita?

**Tali:** Leai

2. O a uiga o le laulaufaiva mimita?

**Tali:** O le fa'amauualuga ma le fa'asausili ma isi uiga le lelei.

3. Aisea e leaga ai le laulaufaiva mimita?

**Tali:** E fa'atupu ai le vevesi i so'o se mafutaga, aiga, nuu, Ekalesia ma le malo.

4. O le a se feau ua e maua mai i le tala. (tu'u le avanoa e tali mai ai le vasega)







ae o lo'o o e auai i le fa'apopotoga. E le'o o e mafuta ma le Atua, ae o ona o le masaniga e auai i le lotu. Ae o le valaaulia a Iesu lea ua aumai. O lo'o fetalai Iesu i se fesoota'iga vavalalata o tatou o tagata Kerisiano ma Ia. O ai Ia? O Ia o le Atalii, o Ia foi o le ua umia le pule o mea uma.

“Outou uma o tigaina ma mafatia i avega.” E leai lava se isi o i tatou e leai se mea o tigaina ai, pe leai foi se mea mamafa i lona olaga. E tofu uma lava tatou ma vaivaiga, tofu foi le tagata ia ma ana avega o lo'o tauave. O tigaina o le tino, tigaina o le mafaufau, tigaina o le loto ma tigaina o le agaga. O lona uiga la, o i tatou uma lava ua i ai mafatiaga, o tatou na lea ua valaau mai i ai Iesu tatou te o atu ia te Ia. Silafia lelei e Iesu mea o lo'o mamafatu i o tatou olaga. Ma ia fa'apea mai ai, ‘O a'u e malolo ai outou.

E leai se isi o tatou e fia ave avega mamafa i le olaga atoa. Tatou te manaomia le mapusaga. Tatou te manaomia le malologa. Tatou te manaomia le saolotoga. E maua ia Iesu lo tatou malologa ma lo tatou saolotoga. A tatou faaa'oa'o ia Iesu, ma tatou mulimuli ia Iesu, ma avea i tatou ma soo moni o Iesu, ona tatou maua lea o le malologa o tatou agaga. O le upu moni, tatou te feagai pea ma faigata ma lu'itau o le olaga nei. Ae a tatou o ia Iesu, ma tatou amoina lana amo e amo gofie aua o lo'o tauamo fa'atasi ma Iesu.

#### **GALUEGA FA'ATINO:**

1. O ai tagata ia o lo'o momoli i ai le valaaulia a Iesu?

**Tali:** O tagata o lo'o taotaomia ma saisaitia ona o puleaga a le malo Roma.

2. O le a le uiga o le fetalaiga a Iesu, 'Ia outou omai ia te a'u'?

**Tali:** O le feso'ota'iga vavalalata a le tagata Kerisiano ma Iesu.

3. O a ni a'oa'oga taua ua mafai ona maua mai i le tala sa fa'amatalaina? ( tali mai ai le vasega)

**PESE:** Le mafutaga fiafia, e le mafa'atuaia  
Fa'alagolago i a'ao o Iesu  
Le filemu, le manuia e maua uma ia te Ia.  
Fa'alagolago i a'ao o Iesu.

Ia tofi e le faiaoga se tama e fa'ai'u le vasega i le tatalo.



#### **ASO SA ME 10, 2026**

**MATAUPU:** “UA LE MAUTONU MOSE” (Moses doubts)

**TUSI FAITAU:** Esoto 4: 1-17

**SINI:** Ia malamalama tamaiti, a valaauina le tagata e le Atua, e tapena foi ma saunia mea uma mo le tagata.

#### **FA'AMANATU MO FAIAOGA:**

Faatulaga atu foi i lenei taeao fou i le suafa mamalu o lo tatou Atua silisili ese. Malo lava le folau manuia, manatu o lo'o manuia uma tatou i le tausiga alofa a le Atua i lo outou soifua ma lo tatou ola. Fa'amalo foi le onosa'i i feau ma galuega o lo'o feagai pea ma outou, aemaise ai foi o la outou galuega faa-faiaoga Aso Sa. O tatou lava ua valaauina e fai ma mea faigaluega a le Atua, e tapena foi ma saunia e le Atua mea uma mo le galuega. O le ala foi lea o le taugologo pea, ina ia fa'amaoni ona fai lau tapenaga o le vaiaso, e ala lea i le faitau pea o le tusi faitau mo le mataupu. Ia manuia le tapenaga.

#### **SINA FESOASOANI MO LE MATAUPU:**

O le valaau a le Atua ia Mose, o le ata vaaia lea o le Atua na te tofofi ma fa'aoga tagata e fa'ataunuu ai lona finagalo alofa i le lalolagi ma ona fa'afitauli. O manatu o le tagata, e le o le finagalo lea o le Atua. O le tali a Mose, o ona lava ia mafaufauga fa'aletagata e pei foi ona masani ai tatou. E atagia mai e le o malamalama Mose i le Atua ua valaau mai e alu, o le ala lea na ia tali ai, o ia o se tagata e leiloa tautala. Ua galo ia Mose, o le Atua na faia mea uma e o'o lava i le tagata.

Peita'i, e tofua lava i tatou ma o tatou valaauina mai le Atua. E i ai foi le fa'amoemoe mauualuga o le Atua na ala ai ona ia foia'iina mai ia i tatou ta'ito'atasi o le ola, le malosi, o taleni, ma aoga. O le fa'amoemoe, ina ia fa'atumauiina le lelei, le matagofie, le alofa o le Atua i le siosiomaga o mea uma na ia faia, e oo lava i le tagata soifua na ia faia i lona fa'atusa.

E saunia foi ma tapena e le Atua le tagata ina ia avea o se mea faigaluega, na te fa'aogaina tatau i ona lava taimi talafeagai, e fa'ataunuu ai lona finagalo ina ia tupu pea le ola, susulu pea le malamalama, ma ia atagia pea le Atua alofa i le lalolagi. Po'o le a lava le le atoatoa o Mose, na fa'aatoatoa lava e le Atua i lona au fa'atasi ma ia. O le tapenaina o Mose mai lona fa'atoa fanau mai, ma la'asaga eseese uma na ia ui mai ai, o le tapenaina lava lea o Mose e saunia ai o ia mo lona valaauina e le Atua mo se fa'amoemoe e lavea'i tagata o loo nonofo i le fa'apologaina.

E fa'apena foi oe ma a'u le tagata ua foa'i i ai e le Atua le ola, le malosi, le gafatia ma le avanoa e fa'aaoga ai lo tatou ola. Po'o le a lava lou valaauina, ua valaauina ai oe e le Atua, ma ua fa'atamaoigaina ai oe e le Atua. Ia e iloa ma mautinoa, o lo'o auai mai foi le Atua e tauto'alua o eina ia taunuu lona finagalo i le lelei ma le matagofie ua ia finagalo i ai. O le Atua na lavea'iina Isaraelu mai le nofo pologa i Aikupito, o le Atua foi lena na ia faia le lavea'i mo le tagata agasala ina ua afio mai ma foa'i lona lava soifua e fai ma taulaga togiola mo le lalolagi.

### **GALUEGA FA'ATINO: Tusiga Tala**

1. Ia tu'u le avanoa i le vasega e tusi mai ai, pe toe fa'amatala mai ai le tala ia Mose, e fua i lona iloa i le mataupu sa fa'amatalaina.
2. Ia ta'u mai lava e le tamaiitiiti po'o le a lona fa'amoemoe o mafaufau i ai mo lona lumana'i, e tusa ma lona valaauina.

**PESE:** Mose, Mose, tatala ou seevae

Ua sa le mea nei ona e tu ai.

Le Atua o Aperamo, Le Atua o Isaako ma Iakopo.

Ia saunia e le faiaoga se tatalo e fa'ai'u ai le mataupu.

**ASO SA ME 17, 2026**

**MATAUPU: "APERAMO" (Abram)**

**TUSI FAITAU:** Kenese 12: 10-20

**SINI:** Ia malamalama tamaiti, o lou malaga ma le fa'atuatua i le Atua i lenei olaga, e taunuu manuia ai fa'amoemoega uma.

**FESOASOANI MO FAIAOGA:**

'E feagai pea la tatou savaliga ma fa'afitauli aemaise o faigata e tele i le ala, paita'i, e le tu'ulafoa'iina lava tatou e le Atua. O lona alofa lava lea ua tatou maua ai ma le manuia lenei aso fou, e fa'aopoopo i aso o lo outou soifua ma lo tatou ola. Viia ai pea lona agalelei e le aunoa. Fa'afetai atu foi ona o lo outou soifua valaauina e ala i la tatou galuega fa'a-faiaoga Aso Sa. O la le aposetolo, 'E le se mea fa'aleaoga lo outou tautiga i le galuega a le Atua.' Ia tatou fa'amalolosi pea i le tapenaina o le mataupu o le Aso Sa.

**FA'ASOA MO LE MATAUPU:**

O le fa'amoemoe ma le finagalo o le Atua ia Aperamo na poloa'iina ai ina ia tuua o lona nuu, ma tagata o lona nuu ma le aiga o lona Tama, ae alu i se nuu e faasino atu ai ia te ia. O se poloaiga e faigata ma e le talia gofie e se tasi pe a fua atu i le faasinomaga ma le tupu'aga na ola mai ai Aperamo. O se Tama ua matua le soifua ma ua iloa ai o se tagata ua lava lona silafia ma lona fa'atuatua i lona Atua. Peita'i, o lea ua faalogo ma le manino Aperamo i mea um aua fetalai mai ai le Atua e tusa o faamanuiaga na te maua, o ia ma lona aiga. Manino upu o le fa'amanuiaga a le Atua mo Aperamo; 'Ou te faia oe ma nuu tele, ou te faamanuia foi ia te ia, ou te matua faamamaluina lou igoa, e manuia foi oe. Ou te fa'amanuia atu ia te i latou o e faamanuia ia te oe, ou te fa'amalaia atu foi ia te i latou o e fetuu ia te oe, e manuia foi ia te oe aiga uma o le lalolagi.' O lea na alu ai loa Aperamo e pei ona poloa'iina ai o ia e lona Atua.

Fai mai ua alu le malaga i Kanana i le mea e i ai Sekema i le aluna o More, ma avea ma ona nuu, toe malaga ma taunuu i Peteli ma aga atu i le itu i toga, ae o le taimi lea fai mai na oge ai lea nuu, o lea na toe o ifo ai loa i Aikupito i lona to'alua o Sarai e nonofo ai. O le tala malie, fai mai ua fai ane Aperamo i lona to'alua o Sarai, afai e vaai ane tagata Aikupito ia te ia, ona fai ane lea o lana ava, ona latou fasioti lea ia te ia a e fa'aolaina ia. Ae fai atu i ai, o ia o lona tuafafine ina ia saogalemu ai o ia, e ola ai foi Aperamo. Ua agalelei Farao ma ona tagata ia Sarai ma o lea na foa'iina i ai o mamoe, o povi ma asini po'a e o'o lava i auauna asini fafine ma kamela. Peita'i ua fa'atigaina e le Atua o Farao ma lona aiga i mala tetele ona o Sarai le ava a Aperamo. Ua salamo Farao i le mea ua tupu na te le'i iloaia. O lea na tuuina atu ai loa lea o Aperamo ma lana ava e o ma ave uma mea ua maua.

O le aotelega o le mataupu ma le tala pei ona tatou maua, o faiga ma fuafuaga loloto ma le mamao a le Atua mo Aperamo mai lona aiga ma lona nuu, o ata vaaia ia o le Atua e le o'o i ai se poto o le tagata. O le Atua alofa ma le Atua e fa'amaoni ana folafolaga mo lana auauna. Ua silafia ma ua filifilia ai e le Atua Aperamo ma ana auauna, e ala mai ai le manuia o aiga uma ma nuu uma o le lalolagi. O faiga ofoofogia a le Atua e tapena ai le tagata faatauvaa e malaga ai i le mea e leiloa, o se nofoaga e le'i vaaia muamua e Aperamo, o ni fa'amanuiaga e le'i manatu foi Aperamo na te mauaina. A o le tino mai o le faamoemoe o le Atua mo Aperamo ona o le fa'atuatua o



**MATAUPU: “O LE AGAGA PAIA” (The Holy Spirit)**

**TUSI FAITAU:** Tito 3: 3-8

**SINI:** Ia a’oa’o atu i le vasega, ina ia malamalama pea i le taua o le galuega a le Agaga Paia i o tatou tagata.

**MO FAIAOGA:**

‘Aua lava ne’i ia te’i tatou, a ia tu’uina atu i le Atua, le viiga, le fa’amanu ma le fa’ane’etaga, ona o lona alofa ma lona fa’amaoni. O le fa’amaoni lea o le Atua, ua momoli mai ai lo outou soifua ma lo tatou ola i lenei aso fou. Malo le pale fa’afetai le onosa’i i le fa’atinoina o tiute ma faiva o lo’o feagai pea ma outou. Ia fa’amalosia pea tatou e le mana o le Agaga Paia, ma ‘ia saunia loloto ai tatou ae a la tatou galuega fai fa’atasi. O le tusi faitau lava, e nanea ai lau tapenaga ia lava le taimi e su’esu’e ai.

**SINA MANATU MO LE MATAUPU:**

O le Aso Sa lenei o le Penetekoso e pei ona fa’amanatuina ai e le au Kerisiano, i le vaitau lenei i tausaga ta’itasi. O le Penetekoso, o le aso na afio ifo ai le Agaga Paia i luga i a’i latou sa i ai, ma vaaia ai e le ‘au soo ma i latou uma na i ai le laulaufaiva afi peiseai ua vaevaeina, o se vaaiga mata’utia. Ae o le tatou tusi faitau e pei ona i ai le tatou mataupu i lenei taeao, ua a’oa’o atu Tito i le taua o galuega a le Agaga Paia ua fa’aalia i ai latou. Fai mai a ia, Aua o i tatou foi, sa valea i tatou anamua, ma faalogogata, ma faaseseina, sa auauna i tu’inanau ma mea eseese e fiafia ai, sa nonofo ma le loto feitaga’i. A ua faaalia mai le agalelei ma le alofa i tagata o lo tatou Faaola le Atua, ona faaola mai ai lea o ia ia i tatou, e le ona o galuega o i le amiotonu sa tatou faia, a e tusa ma lona lava alofa i le faataeleina i le toefuataiina ma le faafouina e le Agaga Paia.’

Sa saunia e Iesu le faaolataga e ala i lona maliu mo a tatou agasala, ua avea ai o Ia ma o tatou faaola. O le Atua sa fuafuaina ma tapenaina le galuega o le fa’aolataga, na te faamagaloina foi o tatou agasala. Sa galulue faatasi le Tama ma le Alo ina ia laveaiina tatou mai o tatou leaga. Sa malaga faatasi foi Paulo ma Tito i Ierusalema ma Kereta. Ona tuua lea e Paulo Tito i Kereta na te taitaiina ekalesia fou ia ua amata ona fotufotua’i i le motu. Sa ia Tito tomai faata’ita’i, o le ala lea na tuu atu ai e Paulo ia te ia matafaioi fa’ata’ita’i, ma fa’amalosia ia e fa’aoga fa’alelei ona tomai.

O me aua totoe, e faasino lea i le fa’amautuina o a’oa’oga sa’o, ma le tofia o tino matutua moa ai uma o le motu. O le galuega foi lea a Paulo i ekalesia na ia asia i ana faigamalaga. Sa le mafai ona ia nofo pea i ekalesia nei, ua ia iloa foi e mo’omia e ekalesia le ta’ita’iga mautu. O e na tofia, sa fa’amoemoeina e ta’ita’i o latou ekalesia e ala i le a’oa’oina atu o le talitonuga sa’o ma tonu, ma fa’atuputupu le au fa’atuatua ina ia matutua i la le agaga, ma fa’atamaoigaina latou ina ia ola mo Iesu Keriso, e ui i malosiaga e ono lepetia ai. Sa fa’aoga lelei e Tito lona tomai fa’ata’iat’i, e a’oa’oina ai tagata, ina ia fa’atuputeleina lo latou fa’atuatua i le Keriso manumalo. Ae o le Agaga Paia ua fa’amaligi tele ifo i luga ia i latou, ona o Iesu Keriso lo tatou Fa’aola.

Tamaiti, o le Agaga Paia e maua ai e tatou uma le loto tetele e fa'atino ai mea uma tatou te manana'o i ai. Na te fa'amalosia i tatou, ina ia tatou savavali pea i luma ma le fa'atuatua fa'amaoni, aemaise o le loto talitonu ia Iesu Keriso lo tatou Alii.

### **GALUEGA FA'ATINO: Talanoaga**

1. O a ni auala e mafai ai ona avea oe ma fa'ata'ita'iga lelei mo lou uso-a-tagata? A o ai foi nisi o le Ekalesia, aiga ma nuu o fai ma fa'ata'ita'iga lelei i lou olaga? Ia fai ma ta'iala fesili nei aua le fa'atalanoaga ma le vasega.

### **A'OA'OGA:**

1. E taua le mafutaga ma le Agaga Paia, e fa'amalosia ai lou ola galue fa'amaoni.
2. O Iesu le fa'ata'ita'iga sili, e iloa ai i tatou le ola amiotonu ma le ala e tataua ona savavali ai.
3. Ia alofa i so'o se tagata, ma 'ia fiafia foi e ola mafuta atu i isi tagata.

### **PESE: Le mafutaga fiafia, e le mafa'atuaoia**

Fa'alagolagi i aao o Iesu.

Le filemu le manuia, e maua uma ia te ia

Fa'alagolago i aao o Iesu.

**TATALO:** Agaga Paia e, lo matou fesoasoani sili, ia e mafutaina pea i matou i taimi uma, ma 'ia matou lagonaina pea i o matou lotu. A'oa'o mai pea matou i ou ala uma, e manuia ai o matou olaga. Fa'amagalo i matou le fanau le usita'i. Ona o Iesu la matou Uo sili. Amene.

### **MANUIA LE ASO SA PENETEKOSO!!**

BB

### **ASO SA ME 31, 2026**

#### **MATAUPU: "SUEGA FA'AMANATU"**

**TUSI FAITAU:** Mataio 11:20-30, Esoto 4:1-17, Kenese 12:10-20, Tito 3:3-8

**SINI:** Ia fa'amanatu ai pea i le vasega, mataupu sa a'oa'oina ai o lenei Masina, ia latou iloa ai e i ai le taua o le Aoga Aso Sa.

#### **FESOASOANI MO FAIAOGA:**

Ua malo afua ailao ua maua i le alafa'i mai i lenei foi taeao fou, fa'afetai i lana tausiga i lo outou soifua ma lo tatou ola. Fa'amalo atu foi le fa'amalolosi i tiute ma faiva o lo'o feagai pea ma outou. Manatu lava o lo'o sologa lelei mea uma e tusa o le fa'atautaiga o la tatou galuega, ua tatou o'o mai foi i le Aso Sa mulimuli o lenei Masina, ua fa'amalo fai o le faiva. Ua tapena atu lava fesili o mataupu ta'itasi, a o le fa'atinoina, e taoto atu lava ia outou susuga i faiaoga mo le faiga e fai ai. A 'ia Siaki lelei ma ia fai ni fa'ailoga mo le vasega. Ia manuia le tapenaga.

#### **FA'ASOA MO LE MATAUPU: Fesili ma Tali**

1. 'Ia outou omai ia te a'u' O le a le uiga o lea fetalaiga a Iesu?

**Tali:** O le feso'ota'iga vavalalata a le tagata ma Iesu e ala i le tatalo.

2. Aisea ua fetalai ai fa'apea Iesu e tusa ma le molimau a Mataio?

**Tali:** Ona o le vaitau o lo'o mamafa pulega a le malo Roma.

3. O ai tagata ia o lo'o momoli i ai le feau a Iesu?

**Tali:** O tagata o lo'o taotaomia ma saisaitia lagona.

4. O a ni a'oa'oga sa e maua mai i le tala sa fa'amatalaina? (tali mai lava i le mea sa e maua i lau fa'alogo)

5. I le amataga o le mataupu e 4, o le a le tali a Mose i le Atua?

**Tali:** O le a le talia mai ia e le nuu, aua fai mai i latou, E le'i faaali le Alii ia Mose.

6. O ai na tofia e le Atua e fai ma failauga pe fesoasoani ia Mose?

**Tali:** O Arona le uso o Mose

7. O le a le tofiga o Arona e pei ona ta'ua?

**Tali:** O le ositaulaga

8. Aisea na alu ai Aperamo i Aikupito?

**Tali:** Ona ua oge le nuu

9. O le a le mafuaaga na ala ai ona fai Aperamo ia Sarai e pepelo ia Farao pe a fesili ane fai i ai o ia o lona tuafafine?

**Tali:** Ona o le lalelei tele o Sarai ne'i mana'o i ai Farao, ona fasioti lea ia te ia.

10. O le a le uiga o le Penetekoso e pei ona fa'amanatuina e le 'au Kerisiano?

**Tali:** O le afio ifo o le Agaga Paia.

Fa'afetai tele mo le galuega aemaise o le fa'ataunuuina o le tatou suega faamanatu, ia ave i le vasega le tusi faitau o le mataupu o lumana'i, o le galuega lena e fai le fale. Ia saunia se pese ma tofi se tama e fa'ai'u le vasega i le tatalo.

## IA MANUIA LE ASO SA!!



**ASO SA IUNI 07, 2026**

**MATAUPU: "O MAI NEI, TATOU MAFAUFAU"** (Come now, let us reason)

**TUSI FAITAU:** Isaia 1: 10-20

**SINI:** Ia malamalama tamaiti, o le ola agasala o Isaraelu, na mafua ai le feau a Isaia, ina ia salamo ma suia o latou olaga.

**FA'AMANATU MO FAIAOGA:**

E vivii a'e o tatou loto i le Alii ma fa'afetaia lona silisili 'ese, aua ana le seanoa lona alofa ma lona agalelei, tatou te le aulia mai ma le manuia lenei foi Masina. Talitonu foi o lo'o tatou maua fa'atasi lenei taeao i le manuia mai ia te Ia. Ua fa'amalo le tauata'i fa'afetai le fa'atoatoa, ua se toa lava ma outou e tusa o auaunaga eseese ua valaauina i ai lo outou soifua auauna. O le fa'amanatu lava, ia tautuana lau tapenaga, ia matua lava le taimi mo le tusi faitau e su'esu'e ai. Ia saunia outou mo le mataupu.

**SINA FESOASOANI MO FAIAOGA:**

O le tatou mataupu o lenei taeao, o le valaau mai le Atua e auala atu i le perofeta o Isaia, a'o le feau mo Isaraelu o le nuu o le Atua ina ia salamo ma suia a latou amioga. Fetalai le Atua, afai latou te le gaua'i ma foi atu ia te Ia, o

le a latou mauaina fa'amanuiaga i le eleele e ala lea i meaai lelei, ae afai latou te le usita'i, o le a faao'o atu ia i  
latou le faamasinoga a le Atua. Ua valaau le Atua i ta'ita'i o Isaraelu, ia latou fa'alogo i le afioga a le Atua, nai lo  
le faia o a latou amioga masani.

I le fuaiupu e 11 e o'o i le 15, ua fa'aalia e le Atua le le fiafia i le tele o taulaga ma tausamiga a Isaraelu, ona o a  
latou amioga leaga ma le le fa'amaoni. E le talia e le Atua le tele o a latou taulaga, pe a le o gatasi ma le salamo  
ma le fa'amasinoga tonu. O lona uiga, e faia fua mea uma latou te faia, pe a le foi i le Atua ma o latou loto ua  
salamo fa'amaoni. E le aoga ona o e fai taulaga i le Atua, ae o lo'ola agasala pea ma avaga loto i atua fa'apaupau  
o isi malo. Le nuu na osi feagaiga ma le Atua, a'o lea ua fultua ma galo le Atua. Ua na ona fa'alagi o lo latou  
Atua i o latou laugutu, a o loto ua taumamao lava. O le afuaga lea o le valau a Isaia, e omai se'i toe mafaufau ma  
feutaga'i ma le Atua.

Ua galo ia Isaraelu, e i ai le taimi o le fa'amasinoga tonu a le Atua, lea ua fa'aataata ma fa'ailoa i ai e Isaia, ma e  
taunuu lava i le taimi a le Atua e finagalo i ai. O le mea mautinoa, e le finagalo le Atua e fan olona nuu, e le  
tuulafoa'ia foi e le Atua lana fanau, ae a'oa'i ma fa'atonu pe a le usita'i ma faalogo. O le nuu na ia tauto ma osi  
feagaiga ai, na ia faia foi Tulafono e fai ma ta'ita'i tama i le olaga o Isaraelu. Peita'i, o se nuu ina ola le usita'i  
ma ola fa'amaualuluga i le Atua na osi feagaiga ma o latou Tama, o Aperamo, Isaako ma Iakopo.

O le a'oa'oga foi lea mo tatou uma, ia tatou ola ususita'i i le Atua na faia i tatou, po'o a lava mea ua tatou maua,  
le malosi, le potu, le tamaoiga ma isi, 'aua ne'i o tatou manatu ai o a tatou ia. A 'ia tatou fa'afetaia le Atua e ou  
mea uma ua tatou maua, ma 'ia tatou iloa ona salamo pe a o tatou sese ma galo le Atua. E le finagalo le Atua ia  
tatou fano i le agasala, o le ala foi lea na auina mai ai lona Alo o Iesu, ina ia toe avatu tatou i le mafutaga vavalalata  
ma Ia.

**GALUEGA FA'ATINO: Fesili faatupu manatu**

1. O le a le mea ua tupu i le nuu o le Atua?  
**Tali:** Ua ola agasala Isaraelu i luma o lo latou Atua.
2. O le a le feau a Isaia mo Isaraelu?  
**Tali:** O le valaau e omai se'i o latou mafaufau fa'atasi, ma ia toe foi i le Atua.
3. O a ni a'oa'oga taua sa e maua mai i le tala? (tuu le avanoa e tali mai ai le vasega)

**A'OA'OGA:**

1. 'Aua ne'i galo le Atua i lau savaliga o lo'ola faia i le lalolagi nei.
2. Ia fa'amasani i le amio lelei.
3. E taua le salamo ma foi i le Atua pe a iloa ua sese.
4. E le finagalo le Atua ia tatou fano i le agasala.

**PESE: #117, Pese ma Viiga**

Ia saunia e le faiaoga se tatalo e fa'auma ai le mataupu.

**MANUIA TELE TAPUAIGA O LE ASO SA!!**

\*\*\*\*\*

**ASO SA IUNI 14, 2026**

**MATAUPU: “LATOU, AE LE O TATOU”** (Them, not us)

**TUSI FAITAU:** Isaia 10: 1-4

**SINI:** Ia malamalama tamaiti, o ai o lo’o fa’atatau i ai le mataupu e pei ona aumai e le tusi faitau.

**FESOASOANI MO FAIAOGA:**

Soifua manuia ma le lagi e mama i lenei foi taeao fou, talofa talofa lava, talosia i le alofa o le Atua, o lo’o manuia i tatou uma. Malo foi le onosa’i i o outou faiva alofilima o lo’o feagai ai, ae faapea foi la tatou pitolaa faafaioga. Aso Sa. Ua tatou aga’i atu i le si’ui o tatou galuega o le afa muamua o lenei tausaga. Silafia lava e le Atua lo outou soifua tautua ae a fanau a le Ekalesia ma le atunuu. Ia saunia pea tatou uma mo le mataupu, o le mea lea, ia lava lou taimi mo le tusi faitau ua tuuina atu e su’esu’e ai. Ia manuia le tapenaga.

**SINA MANATU MO LE MATAUPU:**

O le tatou mataupu o lenei aso, ‘Latou, ae le o Tatou’ O le tusi o Isaia, e tolu vaega o lo’o vaevaeina ai. O le vaega muamua, mataupu 1-39, vaega lua, 40-55, ma le vaega tolu, 56-66, e mafai foi ona tatou va’ava’ai i le isi itu i le faitauga atoa o le tusi o Isaia. O le tatou tusi faitau la o lenei taeao, o lo’o palasi i le vaega muamua. O se lapata’iga i e na faia Tulafono le tonu ma le pule sauai e matitiva, ma latou faapea ai, e le maua e i latou se lavea’i mai i le fa’amasinoga a le Atua. Ua faamamafaina ai foi le matafaioi a le Atua e faaoga ai isi malo, e pei o Asuria, e faia ai faasalaga i ona tagata pe a agasala. E taua tele le vaega lenei e faamanatu ai le pule silisili a le Atua, ma le faasalaga i le amio leaga.

O le taimi ua folafola i le nuu le mea o le a o’o i ai, a’o le feau momoli lea a le perofeta o Isaia, o le a o’o le to’asa o le Alii ia te outou. Aisea? Ona ua amio leaga le nuu, ae afua mai lava ia i latou o ta’ita’i ma e pulea le nuu, ua leai se alolofa, ma ua latou faoa foi mea a e ua aumatua. O le lapata’iga mo tagata o lona nuu, latou te le maua se lavea’i mai le Atua, ma o le a faasala lava i latou. O le faaogaina e le Atua o Asuria, o le faailoga lena o le pule aoao a le Atua i le lalolagi, e le o se Atua faasala lo tatou Atua, a’o le Atua e a’oa’i ma faatonu lana tagata na ia faia.

Fai mai le perofeta o Isaia, se a se mea tou te faia i le taimi e faao’o ai le sala ma le malaia, tou te sosola ea ia te ai e maua ai se fesoasoani. Po’o a lava foi nisi auala tou te faia, e le mafai ona toe liliu ese ai le toasa o le Atua ma outou. O folafolaga a le Atua, e taunuu lava, e le mafai foi e se malosia ma se potu o se tagata ona suia. O le folafolaga a le Atua lea na fa’ataunuu e Isaia, o le a faatafea Isaraelu. E faaoga e le Atua isi malo tuaoi e pei o Asuria, e ave fa’atagata o taua ai Isaraelu, ina ia a’oa’i ai a latou amio, ma ‘ia latou salamo ma foi i le Atua sa o latou osi feagaiga i le amataga.

Tamaiti, o le Atua e pule aoao i le lalolagi, o ia na faia mea uma e o’o lava i le tagata, e galue foi le Atua mo le manuia o mea na ia faia. O lona finagalo foi, ia ‘aua ne’i pauu atu lana fanau i le loloto o le agasala. E le mafai ona tuulafoa’iina e le Atua tatou, po’o a lava o tatou leaga ma faaletonu e faia pea, e tumati’e pea lona alofa mo i

tatou. O le ala foi lea na auina mai ai lona Alo o Iesu Keriso i le lalolagi, ina ia fa'asa'oloto tatou mai le pologa o le agasala.

**GALUEGA FA'ATINO: Fefa'asoa'i ma le vasega**

1. Ia faasoa ma le vasega, ia tuu le avanoa e fesili ai i ni mea e fia malamalama atili ai. Ia fai foi ni fesili mo latou, e iloa ai pe sa fa'alogo i le faamatalaina o le mataupu.
2. O le agaga lava o lea faiga, ina ia fa'alautele ai lo latou iloa i le tala mai le Tusi Paia.

**A'OA'OGA:**

1. O le Atua e pule aoao i mea uma na ia faia.
2. E to'asa le Atua i e amio leaga.
3. E le finagalo le Atua e fano le tagata na faia i lona faatusa paia.

**PESE:** Le Alii e, le Atua e,  
Le fai mea e mafai.  
Au galuega e lelei  
Matou te ofo ai.

**TATALO:** Le Atua e, faafetai i lau pule ua matou maua ai lenei aso, o lou alofa e le mavae lea mo i matou lau fanau. Viia lau afio, ona o lou alofa ma lou fa'amaoni, e ui lava i o matou amioga le tonu, a o lo'o e alofa mai pea. Fesoasoani mai pea i lo matou vaivai, ma fa'amagalo matou le fanau agasala. Ona o Iesu le Faaola. Amene.



**ASO SA IUNI 21, 2026**

**MATAUPU: "GALUEAINA" (Working it out)**

**TUSI FAITAU: Iona 4: 1-11**

**SINI:** Ia malamalama le vasega, i le faatinoga o le ita o Iona, ma le a'oa'iga a le Atua ia te ia.

**FA'AMANATU MO FAIAOGA:**

Ua tatou o'o mai i le faasifoga o la tatou galuega i lenei foi vaiseuga o le tausaga, faafetai ai i le Atua sa ia tauto'alua i lo tatou vaivai i le galuega. Malo le faamalolosi, faafetai foi i lo outou taimi sa faaavanoaina, e a'oa'o ai fanau a le Ekalesia i le itu faaleagaga. E le 'auaoa le silasila a le Atua e tusa o lo outou soifua galulue ai i lana galuega, o ia foi na te fa'amanuia e tusa o lo outou tautiga. Ae le mafai lava ona tu'ua la tatou faamanatu, ina ia tautuana lau tapenaga o le vaiaso mo le mataupu. Ia mafutaina e le agaga o le Atua lau tapenaga.

**SINA FESOASOANI MO LE MATAUPU:**

O le tatou mataupu i lenei taeao, o le tala i le ita o Iona, ma le a'oa'iga a le Atua ia te ia. O le ita o Iona na ia tatalo ai i le Alii, e sili ai ona oti nai lo le ola. O lagona ua tutupu a'e ona o le le usita'i i le faatonuga a le Atua, e alu e ave le feau i Nineva ae sola i Tasesa. Ua toe mafaufau ane ae ua le aoga ua masa'a le ipu vai, e le mafai ona toe aoao mai. Peita'i, e le mafai ona tu'ulafoa'ia e le Atua le tagata na ia valaauina e fai ma ave feau e momoli lona

finagalo alofa mo Nineva. Po’o le a lava le le usita’i o Iona, e le’i tu’ulafoa’iina e le Atua, na saunia foi e le Atua mea uma mo le saogalemu o lana auauna.

Fai mai le tala, ona alu ai lea o Iona ua nofo i le itu i sasa’e o le aai, ua ia faia foi le fale apitaga ma ua nofo ai ma mafaufau pe se a le mea e o’o i le a’ai. Na saunia foi e le Atua le kikaiona ma faasosolo i luga o Iona ulu, e fai ma lavea’i i ona tiga. O le mafuaaga o le ita o Iona, ona ua le o’o le to’asa o le Atua na folafola ia Nineva. O le ala foi lea na sola ai i Tasesa, e le’i mana’o e o’o le feau ia Nineva. Peita’i, e le mafai ona sola se tasi i luma o fofoga o le Atua, e le faia foi le mea e loto i ai le tagata, ae tatau ona faataunuu le finagalo o le Atua. O le Atua foi e le faapito Iona alofa, ae tutusa tagata uma na ia faia. E ui o se vaai faapea na atagia ia Iona, ae o manatu o le tagata, e le o le finagalo lena o le Atua.

O le valaauina o Iona e le Atua, na galue ai foi le agaga o le Atua ia Iona, a tatou mafaufau i ai, na o’o lava Iona i le loloto o le moana, o le ata o le loloto ma le ogaoga o faafitauli ma faigata e feagai ma le tagata valaauina. Ae na saunia lava e le Atua le I’a e lavea’i ai lana auauna o Iona, e le’i gata ai ae na ia lavea’i foi a’o i le vao o ia. E le’i manatu alofa Iona i tagata o Nineva, na manatu lava mo na’o ia lava, o le vaivaiga foi lea o lo’o ta’atele i nisi o tagata. E saili lava le manuia o le tagata lava ia, ae le manatu alofa ia i latou o lo’o mana’omia le fesoasoani po’o e lima vaivai ma matitiva. O le uiga lea o le fetalaiga a le Atua ia Iona, “Ua e alofa i le kikaiona, o le mea na e le galue ai, pe faatupuina; o le mea na tupu i le po e tasi, na mamae foi i le po e tasi. O a’u foi ou te le alofa i lea i Nineva le aai tele, o lo’o i ai tagata e sili ona toatele i le selau afe ma afe e lua fulu.”

Ioe tamaiti, o le mea ia tatou iloa, o lo’o galue pea le agaga o le Atua i mea uma tatou te faia i lenei olaga tatou te i ai. E le mafai foi ona tu’ulafoa’iina tatou e le Atua, tusa lava po’o a o tatou leaga, e le mafai foi ona tatou sosola ‘ese mai fofoga o le Atua i so’o se mea tatou te faia.

### **GALUEGA FA’ATINO: Fesili ma Tali**

1. O le a le igoa o le laau na saunia e le Atua na matua fiafia ai Iona?

**Tali:** O le kikaiona

2. O le a le uiga o le upu “ogotia” o lo’o ta’ua i le tala?

**Tali:** O le sulugia i le La

3. O fea na sola i ai Iona?

**Tali:** O Tasesa

4. O a nisi a’oa’oga sa e maua mai i le tala ia Iona? (tali mai lava le tamaitiiti)

### **A’OA’OGA:**

1. E le faapito le alofa o le Atua, ae tutusa tagata uma.

2. E saunia e le Atua mea uma mo lo tatou ola valaauina.

3. E taua le usita’i ma faalogo i le Atua.

4. ‘Aua le faia o tatou loto, ae fai le finagalo o le Atua.

**PESE:** Fa’alogo ma usita’i, e leai se isi ala

E fiafia ai Iesu pe a fa’alogo ma usita’i.

Galue ma fa'amaoni, fiafia ma olioli

E maua ai tau, e aumai e Iesu.

Malo lava fa'afetai mo le galuega o lenei Aso Sa, ia tofi ane se tama e fai le tatalo e fa'auma ai le vasega.

### MANUIA TELE LE ASO SA!!



**ASO SA IUNI 28, 2026**

**MATAUPU: "SUEGA FA'AI'U"**

**TUSI FAITAU:** Isaia 1:10-20, Isaia 10:1-4, Iona 4:1-11

**SINI:** Ia su'esu'eina pea le fanau, ina ia manatua tala mai le Tusi Paia sa fa'amatalaina e faiaoga.

**MO FAIAOGA:**

Manatu ua fa'aifo faiva o le afa muamua o lenei tausaga, malo lava ia outou susuga i faiaoga Aso Sa le galulue ma le fa'amalolosi i lo outou valaauina. O upu lava a pe aposetolo o Paulo, 'e le se mea fa'aleaoga lo outou tautiga.' O le Atua lava, 32 ate fa'amanuia e tusa o lo outou soifua auauna ai i lea foi itu o le galuega. O le tatou suega fa'amanatu mulimuli lea mo le afa muamua o le tausaga, ua taoto atu lava lona fa'atinoina ia outou susuga i faiaoga. Pau o lea, ia Siaki ma togi lelei a latou suega, ma 'ia fai ni nai fa'aailoga mo latou.

**FAIGA O LE SUEGA: Fesili ma Tali**

1. O le a le feau a Isaia, mo Isaraelu le nuu o le Atua?

**Tali:** O le a'oaiga mo Isaraelu, ia latou salamo.

2. E fia vaega o le tusi o Isaia e pei ona ta'ua i se isi vaaiga?

**Tali:** E tolu, vaega muamua 1-39, lua 40-55, tolu 56-66

3. O le a le mea e o'o i ai le nuu o le Atua pe a gauai ma faalogo?

**Tali:** O le a aai i mea lelei o le laueleele.

4. Ae fa'afefea pe a fouvale ma le usita'i i le Atua?

**Tali:** O le a faaumatia i le pelu, aua ua fetalai mai ai fofoga o le Atua.

5. O a ni a'oa'oga taua sa e maua mai i le mataupu sa fa'amatalaina? (tuu le avanoa i le vasega e tali mai ai)

6. O le a le mea ua tupu i le nuu o le Atua?

**Tali:** Ua ola agasala le nuu o le Atua.

7. A o le a le manatu o tagata Isaraelu i lo latou Atua?

**Tali:** Na manatu Isaraelu, e le o'o le toasa o le Atua ia i latou.

8. O le a tonu le vaega lea o lo'o i ai le mataupu e 10, lea e i ai le tala sa fa'amatalaina?

**Tali:** O lo'o i le vaega e lua e tusa ai ma le vaevaega o le tusi atoa o Isaia.

9. O fea o i ai le nuu i lea taimi e tusa ma le vaega o lo'o fa'aogaina mai?

**Tali:** Ua sauni e fa'atafea

10. O le se a'oa'oga taua sa e maua mai i lea mataupu? (o le avanoa mo le vasega e tali mai ai)

11. I le tala ia Iona, na tuu e le Atua Iona e alu ina ua le usita'i?

**Tali:** E le'i tu'ulafoa'ia e le Atua lana auauna o Iona.

12. O le a le umi na fa'aola ai e le Atua le kikaiona?

**Tali:** Na fa'atupu e le Atua i le po e tasi.

13. O a lagona na o'o ia Iona e tusa ma le mea na tupu?

**Tali:** E lelei ona oti, nai lo Iona ola.


14. O le a le fetalaiga a le Atua ia Iona e tusa o lana tali?

**Tali:** Ua e alofa i le kikaiona, o le mea na e le galue ai, o le mea na tupu i le po e tasi, na mamae foi i le po e tasi. Ae te le alofa ia Nineva o lo'o i ai tagata e sili ona to'atele.

15. O le a se feau manaia sa e maua mai i le tala ia Iona? (tusi uma mai mea sa e taofi mai i le tala)

Fa'afetai tele mo le fa'ataunuaina o le tatou suega fa'ai'u, ia saunia se pese ma fai e le faiaoga le tatalo e fa'aumaina ai le vasega.

**MANUIA TELE LE ALO ATU MO LE MALOLOGA AEMAISE O LE FONOTELE A LE EKALESIA  
I LENEI FOI TAUSAGA. TATOU TOE FEILOA'I IA AUKUSO.**





Tautua Printing Press  
1 Kanana Fou St, P.O. Box 1537  
Kanana Fou, American Samoa 96799  
(684) 699-9810  
<https://efkas.org>